

JAARVERSLAG VAN DIE PRESIDENT – WONDERBOOM ROLBALKLUB - 2010/2011

INLEIDING

As President is dit vir my aangenaam om verslag te doen oor 'n besonder geslaagde jaar wat Wonderboom Rolbalkklub ervaar het. Ek sal poog om in hierdie verslag die aktiwiteite van die bestuur, prestasies wat deur lede van die klub behaal is asook vordering wat op verskeie terreine gemaak is, uit te lig. Dit is uit die aard van die saak nie moontlik, en ook nie nodig om in detail verslag te doen oor al die aktiwiteite van die klub nie. Die doel van hierdie verslag is om 'n opsommende en objektiewe beeld weer te gee van die klub se aktiwiteite en die stand van sake.

BEPLANNING

Aan die begin van die Bestuur se termyn is 'n beplanningsessie onder leiding van 'n ervare fasiliteerder gehou. Die doel van die sessie was om die rigting vir die klub te bepaal vir die kort- tot mediumtermyn, dit wil sê, vir die volgende ongeveer 2 tot 5 jaar. Tydens die sessie is die volgende visie vir die klub geformuleer:

“Die rolbalkklub van keuse vir mense wat 'n passie vir die spel het. By Wonderboom Rolbalkklub word rolbal kompetend en sosiaal gespeel vir die pure genot daarvan.”

Om dit te bereik is die volgende 4 prioriteite geïdentifiseer:

1. Om die ledetal van Wonderboom na 180 te verhoog teen einde 2013. Ten minste 50% van die lede wat gewerf word moet jonger as 50 jaar oud wees.
2. Om 'n weldeurdragte plan vir die voortbestaan van die klub gereed te hê vir 'n scenario waar die bestaande ondersteuning van die munisipaliteit verminder aangesien dit 'n wesenlike impak op die klub se finansies en voortbestaan sal hê.
3. Om aan die lede se behoefte vir bykomende “van die baan af” sosiale samesyn te voldoen deur bykomende sosiale aktiwiteite te organiseer.
4. Om meer spelers aan te moedig en toe te rus om kompetend te speel deur gereelde afrigtingsklinieke vir alle spelers, beginners asook ervare spelers, te reël.

Daar is 'n voog vir elkeen van hierdie prioriteite aangewys wat die leiding moes neem in die bereiking van die oogmerk.

VORDERING

Die vraag is nou, hoe is daar gevorder met die bereiking van hierdie oogmerke? Ek doen graag soos volg verslag:

1. Vehoging van ledetal: Gedurende die jaar het nie minder nie as 34 nuwe lede by die klub aangesluit. Dit is 'n besondere prestasie en 'n aanduiding van die goeie naam van die klub en goeie werwingswerk wat lede van die klub gedoen het. Dit is ook verblydend dat ons daarin geslaag het om heelwat jonger spelers te werf. Ongelukkig het 28 lede die klub verlaat. Die belangrikste redes vir lede wat bedank het is eerstens persone wat nie meer speel nie en tweedens verhuisings. Die netto resultaat is dat ons ledetal tans op 164 staan. Die uitdaging om teen einde 2013 180 lede te hê is groot, maar ek is steeds van mening dat dit moontlik is.
2. Finansiële oorlewing: 'n Belangrike ontwikkeling gedurende hierdie jaar was dat daar tydens 'n vergadering met hoëvlak beamptes van Tshwane Munisipaliteit, die versekering verkry is dat daar geen sprake daarvan is dat munisipale sportterreine, soos die waarop ons klub geleë is, per tender verkoop gaan word nie. Verder is die versekering gegee dat die jaarlikse huurfooi nie met meer as inflasiekoers verhoog sal word nie. Hierdie versekerings beteken dat die finansiële oorlewing van die klub oor die korttermyn nie bedreig word nie. In die jaar wat voorlê sal die Bestuur meer aandag gee aan die finansiële oorlewing oor die langtermyn.
3. Sosiale aktiwiteite: Heelwat is gedoen om aan lede se sosiale behoeftes te voldoen. 'n Paar bring-en-braai geleentheid is gereel, die jaarlikse Valentynsdag viering is goed ondersteun en die sosiale samesyn in die kroeg is ook besig om toe te neem. Maandelikse byeenkomste vir enkellopers is gereel en word goed ondersteun. Ek is egter van mening dat moeite gedoen moet word in die komende jaar om te bepaal watter sosiale behoeftes daar nog bestaan en daarvolgens gehandel word.
4. Afrigtingsklinieke: Die klub se afrigters het 'n reuse taak verrig om goeie afrigting aan al die beginners te gee. Die assesseringssessies op Maandagoggende word baie goed ondersteun, selfs deur lede van ander klubs. Weeklikse afrigtingsklinieke op Vrydagmiddae is ook gereel. Ek is van mening dat die aktiwiteite van ons goedgekwalifiseerde afrigters, wat baie van hulle eie tyd afstaan sonder enige vergoeding, beter ondersteun kan word deur klublede. Lede wat wel gebruik maak van hierdie geleentheid kan getuig van die verbetering wat daar in hulle spel ingetree het.

Dit wat betref die 4 strategiese oogmerke van die Bestuur. Ek is van mening dat deur op hierdie 4 oogmerke te fokus, goeie vordering gemaak is en dat daarmee voortgegaan moet word in die jaar wat voorlê.

Wat betref die ander aktiwiteite van die klub, doen ek graag soos volg verslag:

Prestasies van die klub: Daar is deurlopend verslag gedoen oor die uitstekende prestasie van ons lede vanjaar en dit word nie hier herhaal nie. Dit is egter nodig om melding te maak van die uitstekende prestasies van ons dameslede, waarvan die hoogtepunt sekerlik die wen van die BGN Liga se Eerste Divisie deur ons dames eerste span was, die eerste keer in die geskiedenis van die klub. Melding moet ook gemaak word van ons lede wat op nasionale vlak presteer het. Ons is trots op Simon Botha dat hy weereens aangewys is as lid van die Proteas se afrigtingspan en vir sy betrokkenheid op verskeie nasionale strukture. Ons wens ook vir Rea Potgieter en Simon Botha geluk met hulle verkiesing tot die nasionale Blou Oefengroep, waaruit die Senior Proteaspan gekies gaan word. Elbert Broere is aangewys as assistent vir die President van die Internasionale Assosiasie van Gestremde Spelers, 'n besondere prestasie. Al ons lede wat presteer het, dames asook mans, word geluk gewens met die goeie prestasies van hierdie jaar.

Fasiliteite en organisasie: Ons fasiliteite is goed instand gehou en ons perke is dikwels deur BGN gebruik vir toernooie en kompetisies. Ek wil graag vir Fred Bartlett bedank vir sy toewyding en harde werk om ons perke in 'n goeie toestand te hou. Ons kroegkomitee het uitstekende werk gedoen en die begroting vir verkope ver oorskry. Ek bedank vir Jean Entres en sy span vir hulle uitstekende werk. Ons Tegniëse Beampies het weer eens hulle plek volgestaan en was altyd beskikbaar en bereid om te dien wanneer ons hulle nodig gehad het, dankie ook aan hulle. Verskeie lede het gehelp wanneer daar instandhouding en verbeterings aan ons geboue nodig was. Ek bedank hulle ook daarvoor. Die spelreelingskomitee onder leiding van Gerhard Terblanche het uitstekende werk gedoen en verseker dat sosiale spel op 'n goedgeorganiseerde basis plaasvind. Verskeie lede het gereeld en sonder dat daarvoor gevra is, gehelp met voorbereiding van bane vir spel, opruiming na spel en bediening van tee. My dank ook aan hulle. Ons twee kompetisiesekretarisse, Marna Bartlett en Phil Steyn het uitstekende werk gedoen en verseker dat 'n baie besige kompetisieprogram betyds afgehandel is. Ek glo dit is ook aan hulle entoesiasme te danke dat ons vanjaar aanmerklik meer lede gehad het wat aan klubkompetisies deelgeneem het. Die Dinsdagklub het baie goed gefunksioneer onder Tommie Marais se leiding en ek is dankbaar dat hy bereid is om voort te gaan met die taak.

Borgdae en Borge:

- Die Allen Joss Meerhof dag is ons belangrikste borgdag vir die jaar omdat dit 'n geleentheid is waar ons 'n bydrae kan maak ter ondersteuning van die gemeenskap. Ons het 'n donasie van R5000 ontvang van Allen Joss waarvoor ons baie dankbaar is, en met die ondersteuning van ons lede kon ons 'n goeie donasie van kontant, klere en toiletware skenk aan Meerhof skool.

- Die Paasnaweek Kompetisie is weereens aangebied en was 'n groot sukses, alhoewel dit vanjaar slegs op een dag gespeel en nie twee soos in die verlede nie. Dit word sterk aanbeveel dat met hierdie kompetisie voortgegaan word.
 - Die getroude pare kompetisie was weer baie suksesvol en het vir baie opwinding en prêet gesorg.
 - Wonderboom teen Pretoria Noord. Die kompetisie het vanjaar by Pretoria-Noord plaasgevind en is deur hulle gewen.
 - Wonderboom teen Vriendekring. Hierdie kompetisie wat vanjaar by Vriendekring gehou is, is deur Wonderboom gewen.
 - Die Dinsdagklub se borgdae op die eerste Dinsdag van die maand is goed ondersteun en sorg gewoonlik vir goeie kompeterende rolbal.
 - Borge: Behalwe vir Allen Joss wat reeds genoem is, bedank ons ook die volgende borge: Warwick, Perfect Delivery, Robbie Fox, Tommie Marais, Dulce Café, Paul Benade, Gerhard Engelbrecht en verskeie ander klublede wat kleiner donasies gemaak het. Ek wil ook graag vir Jacko van Graan en Piet van Emmenis bedank vir die donasie van betonbanke tussen die twee perke.
- Wat borge betref, is ek van mening dat die bestuur in die komende jaar 'n groter poging moet aanwend om borge te werf. Borge en die reël van borgdae is 'n bron van inkomste wat nog nie goed genoeg ontgin word nie.

Die Uitvoerende Bestuur: 'n Klub kan nie goed funksioneer sonder 'n toegewyde en entoesiastiese bestuur nie. Daarom wil ek graag die lede van die Uitvoerende Bestuur bedank vir hulle ondersteuning die afgelope seisoen. Goeie samewerking en spanwerk was 'n eienskap van vanjaar se bestuur. Baie dankie aan Rea en Cran, ons twee Vise-Presidente, vir hulle ondersteuning, die raad en leiding wat ek van hulle ontvang het, vir hulle bereidwilligheid om in te staan vir my wanneer ek nie beskikbaar was nie en dat ek in die jaar wat voorlê weer kan staatmaak op hulle ondersteuning. Ons Sekretaris, Elbert, het 'n standaard gestel wat moeilik oortref sal word en ek is baie dankbaar dat hy beskikbaar is vir nog 'n termyn. Dankie aan Clare, ons Tesourier, wat in die termyn ons finansiële stelsel gemoderniseer en vereenvoudig het. Die werk wat sy gedoen het sal in die toekoms steeds van groot waarde wees. Aan ons Addisionele Lede, Marie, Bets, Tommie en Simon, dankie ook vir julle bydraes en bereidwilligheid om te help waar dit nodig was. Aan die lede wat uittree, Clare, Marie, Bets en Simon, my opregte dank vir wat julle bygedra het tot die sukses van die klub en geniet die rustyd wat voorle. Ek bring graag hulde aan Tommie wat ook uittree na sewe jaar op die Uitvoerende Bestuur en 'n ruskans verdien.

Aan die lede wat weer beskikbaar is, Rea, Cran en Elbert, ek sien uit daarna om nog 'n termyn saam met julle te dien.

Ten slotte: My dank aan elke lid van ons klub vir u bydrae om 'n sukses van ons klub te maak. Wonderboom Rolbalkklub het 'n besondere karakter en kultuur en dit is te danke aan die lede van ons klub. Baie dankie vir die afgelope jaar se ondersteuning. Dit is 'n eer en 'n voorreg om die President te wees van 'n klub soos Wonderboom.

Piet Stroebe

President.